

## 每週經課朗誦經文(巴克禮台語漢字)2013/03/24

### 共同經課 - 1 以賽亞書五十五章四節~九 a 節

4 主耶和華賞賜我受教示者的舌，互我知怎樣用言語扶助厭倦的人。主逐早起叫醒，叫醒我的耳孔，互我會聽，親像受教示的人一樣。5 主耶和華開通我的耳孔；我並無違逆，亦無退後。6 人拍我的尻脊骹，我出在伊拍；人掇我嘴 的嘴鬚，我出在伊掇；人凌辱我，給我呸涎，我亦無掩面。7 因為主耶和華的確幫助我，所以我無見誚。為著按呢，我互我的面硬親像 石；我亦知我的確無致到漏氣。8 稱我做義者近啦；是誰及我相爭，伊通及我相及倚；是誰做我的對敵，伊通就近我。9 看啊，主耶和華欲幫助我；是誰會定我有罪啊？

### 共同經課 - 2 詩篇三十一篇九節~十六節

9 耶和華啊，我佇患難中，求你憐憫我；我的目矚因為憂悶拍歹，我的心神我的身體亦是按呢。10 我的生命因為憂苦來消無；我的年歲為著吐氣亦按呢。我的氣力因為我的罪惡來衰騰；我的骨頭亦枯焦。11 我因為我一切的對敵成做凌辱，佇我的厝邊兜閣卡傷重；許個識我的人攏驚我，佇外面看見我的人走閃離開我。12 我親像死人，互人袂記得，無人數念；我親像破碎的器具。13 因為我聽見多人的誹謗，四圍攏是驚惶；in相及參詳攻擊我的時，就計謀欲害我的生命。14 耶和華啊，我猶原倚靠你；我講：你是我的上帝。15 我的遭遇佇你的手；求你救我脫離我的對敵的手以及窘迫我的人。16 求你互你的面照光你的奴僕，照你的慈愛拯救我。

### 共同經課 - 3 腓立比書二章五節~十一節

5 恁著有基督耶穌的心做心；6 伊本有上帝的形狀，無掠及上帝平等做所著執守的；7 反轉傾空家己，取奴僕的形狀，成做人的樣相；8 已經有親像人的款式，就屈家己，順服到佇死，甚至死佇十字架。9 所以，上帝高升伊極高，賞賜伊彼個名搬(pôa)過佇萬名的頂面的，10 互見若佇天、佇地，及佇地下的，佇耶穌的名無一個腳頭窩毋跪拜，11 無一個嘴毋稱呼「耶穌基督做主」，來歸榮光父上帝。

### 共同經課 - 4 路加福音二十三章一節~四十九節

1 in全會的人攏起來，帶伊到彼拉多的面前，2 告伊講：「阮看此人迷惑阮的百姓，禁人納稅互該撒，家己稱做基督，做王。」3 彼拉多問伊講：「你是猶太人的王嗎？」應伊講：「你講就是。」4 彼拉多對許個祭司頭及歸陣的人講：「我看此人無罪。」5 總是in愈出力講：「伊搖動百姓，遍猶太傳教，對加利利起，到遮。」6 彼拉多一下聽見，就問：「看此人是加利利人抑毋是？」7 已經知伊屬佇希律所管轄，就送伊互希律。彼時希律也佇耶路撒冷。8 希律看見耶穌，就真歡喜；是久久愛看見伊，因為曾聽見伊的事，閣向望看見伊行神蹟，9 就用多多話問伊，若是耶穌無應伊一句。10 許個祭司頭及經學士倚啲，出力告伊。11 希律及伊的兵目底無伊，戲弄伊，用媿的衫給伊穿，閣送還彼拉多。12 希律及彼拉多平時結怨，彼日就做朋友。13 彼拉多召許個祭司頭及有司參百姓來，14 對in講：「恁帶此個人到我遮，講伊是迷惑百姓的。你看，我佇恁的面前已經審問伊，總是論到恁所告伊的事，我查出伊攏無罪；15 希律也是按呢，因為有將伊送還咱。也你看伊所行無一項應該死的事。16 所以，我欲拍，來解放伊。」17 {到節期，總督必須放一個犯人互in。〔台語羅馬譯本無此節！〕} 18 in一齊喉叫講：「著除去此個人！放巴拉巴互阮！」19 此個巴拉巴，因為佇城內作亂閣割死人，才關落監。20 彼拉多愛放耶穌，就閣及in講。21 若是in叫：「釘伊十字架！釘伊十字架！」22 彼拉多第三擺對in講：「是怎樣？伊有行甚麼歹？我看伊無一項應該死的罪。所以，欲拍，來解放伊。」23 in大聲迫切，求釘伊佇十字架。in的聲卡贏。24 彼拉多擬斷照in所求的來行，25 就解放in所求彼個為著作亂、續割死人關落監的，將耶穌交in，來順in的意思。26 帶耶穌去的時，有一個古利奈的人西門，對鄉下來；in就 伊來，將十字架靠佇伊的肩頭，互伊夯來隨耶穌。27 隨伊的人，有百姓及婦仁人多多；婦仁人為著伊搥胸哀傷。28 耶穌越頭對in講：「耶路撒冷的婦仁人啊，莫得為著我啼哭，著為著恁家己及家己的子兒來啼哭。29 因為時欲到，人欲講：『袂會懷孕的婦仁人，未曾生產的胎，未曾互囡仔吸的奶頭，有福氣！』30 彼時，人就欲對山講：壓阮！也對山仔講：蓋阮！31 「因為佇青的樹木若行按呢，就佇乾的樹木欲怎樣啊？」32 閣有二個犯人，互人帶去及耶穌同受死。33 到一所在，名叫「頭殼碗」，就佇遐釘伊佇十字架，閣釘許個犯人：一個佇正旁，一個佇倒旁。34 耶穌講：「父啊！赦免in；因為in所做的，in毋知。」人就拈鬮分伊的衫。35 許個有司譏刺伊，講：「伊曾救別人；若是做上帝的基督，受揀選的，著救家己！」36 兵丁也戲弄伊，近倚用醋互伊，37 講：「你若是猶太人的王，著救家己！」38 佇伊的頂面有斬條寫講：「此個是猶太人的王。」39 受吊啲的犯人一個褻瀆伊，講：「你豈毋是基督嗎？著救家己及阮！」40 第二個應來責備伊，講：「你既然同受罪，連上帝也毋驚嗎？41 咱受罪是公道，因為咱所受的合佇咱所行，若是此人所行的無一項毋著。」42 就講：「耶穌啊，你佇你的國來的時，著記得我！」43 耶穌就給伊講：「我實在給你講，今仔日你欲及我佇樂園。」44 日中晝，全地黑暗，到三點鐘的時，日的光無去；45 殿內的帳對中裂開。46 耶穌大聲叫就講：「父啊！我的神交代你的手。」諸個話講息，氣就斷。47 百總看見此個代誌，歸榮光上帝，講：「此個真正是義的人！」48 聚集啲看的眾人看見諸個代誌攏搥胸倒去。49 許個及耶穌相識的，以及許個對加利利隨伊來的婦仁人，攏遠遠啲倚來看諸個事。